



**Concello de
Oleiros**

REGULAMENTO DA AGRUPACIÓN MUNICIPAL DE VOLUNTARIOS DE PROTECCIÓN CIVIL DE OLEIROS.

Introducción

En orde á realización de actividades diversas para a protección civil en situacións de emerxencia, os Concellos e os Alcaldes teñen competencias en materia de protección civil, segundo o establecido nos Artigos 25.2.c) e 21.1.y) da Lei 7/1985, do 2 de Abril, Reguladora das Bases de Réxime Local e os Artigos 80, 81 e 92 da Lei 5/1997, do 22 de Xullo, da Administración Local de Galicia.

O exercicio destas competencias ten que levarse a cabo fundamentalmente mediante actuacións dos Concellos e dos Alcaldes coa colaboración dun Concelleiro Delegado de Protección Civil, así como coa intervención coordinada dos servicios municipais adicados de xeito ordinario e permanente ó cumprimento de fins coincidentes coas necesidades derivadas das situacións de emerxencia nos casos de grave risco, catástrofe ou calamidades públicas.

Así mesmo, nos apartados 3 e 4 do Artigo 30 da Constitución española, determinase que poderá crearse un Servicio Civil para o cumprimento de fins de interese xeral e que mediante lei regularanse os deberes dos cidadáns nos casos de grave risco, catástrofe ou calamidade pública, polo que parece necesario que, sen prexuízo do establecido na lexislación reguladora do Servicio Civil e da Protección Civil sobre canto antecede, contémpense os recursos municipais mencionados coa incorporación dos cidadáns ás actividades que desenvolva a Protección Civil municipal, ofrecéndolles así posibilidades para asumir e realizar, voluntariamente, o cumprimento dos deberes que a Constitución lles atribue nas circunstancias aludidas anteriormente.

Por outra banda, a Lei 2/1985, do 21 de Xaneiro, sobre Protección Civil, e o Real Decreto 407/1992, do 24 de Abril, que desenvolve a Norma Básica, en diferentes partes do seu articulado recolle a participación, responsabilidade e competencias das diferentes Administracións públicas na Protección Civil, tendo un papel importante os Concellos que por se-la Administración máis próximas ós cidadáns convírtese na célula básica de protección civil, sendo a primeira en intervir en cantas emerxencias ocorran.

Abundando na normativa, temos que recolle-lo establecido no Decreto 56/2000, do 3 de Marzo, e no Plan de Protección Civil da Comunidade Autónoma de Galicia (PLATERGA), recollido como anexo do mencionado Decreto, onde establécense, entre outras, as directrices para a planificación de ámbito local, así como os cometidos que poden desenvolver-las Agrupacións de voluntarios no estudio e desenvolvemento dos distintos plans de emerxencia..

Para articula-las oportunidades de colaboración dos cidadáns, individualmente considerados, coa protección civil municipal, parece convinte regula-la organización e



**Concello de
Oleiros**

funcionamento da Agrupación de Voluntarios de Protección Civil deste Concello que se vinculará ós servicios básicos de intervención en emerxencias dependentes do Concello para realiza-las tarefas que procedan, sen prexuízo do que poida establecerse nas leis sobre prestación persoal e de servicios con carácter obligatorio.

En virtude do exposto e previo acordo do Concello, apróbase o Regulamento da Agrupación de Voluntarios de Protección Civil deste Concello que se transcribe seguidamente.

CAPITULO I **FINALIDADE**

Artigo 1º

A Protección Civil municipal ten como fin establecer unha organización en base ós recursos municipais, contando coa colaboración das entidades privadas e dos cidadáns, para garanti-la coordinación preventiva e operativa respecto da protección de persoas e bens ante os danos producidos polas situacións de emerxencia nos casos de grave risco, catástrofe ou calamidade pública, sen esquecer todo tipo de emerxencias menores, mediante a realización de actividades que permitan evita-las mesmas, reducir os seus efectos, repara-los danos e, no seu caso, contribuir a correxir as causas productoras dos mesmos.

Artigo 2º

A organización e funcionamento da Agrupación de Voluntarios de Protección Civil, en adiante AVPC, como modalidade de incorporación dos cidadáns ás actividades de Protección Civil, rexirase polo establecido no presente Regulamento, así como polas instrucións e directrices que, a efectos de coordinación xeral e participación no desenvolvemento ou execución dos plans, programas ou actividades no sistema autonómico de protección civil, sexan dictadas polo órgano da Comunidade Autónoma competente nesta materia, e demais Administracións públicas de ámbito superior conforme establécese na Norma Básica de Protección Civil.

Artigo 3º

Poderán vencellarse á AVPC as persoas físicas que con carácter altruista comprométanse a colaborar directamente nas actividades dos servicios de Protección Civil dependentes do Concello.



**Concello de
Oleiros**

CAPITULO II **ORGANIZACIÓN**

Artigo 4º

Un dos cauces para a colaboración voluntaria dos veciños na protección civil municipal levaráse a cabo mediante a incorporación dos mesmos á AVPC á que se refire o presente Regulamento.

Artigo 5º

Poderán incorporarse á AVPC como voluntarios operativos tódolos veciños maiores de 18 anos que cumpran os requisitos de acceso que poidan establece-las Agrupacións sen que en ningún caso poida facerse discriminación por razóns de sexo, políticas, ideolóxicas, relixiosas ou calquer outra circunstancia persoal ou social.

Así mesmo, as persoas maiores de 16 anos e menores de 18, sempre que conste a autorización do que exerza a patria potestade ou tutela, poderan formar parte da Agrupación como persoal voluntario de apoio.

Artigo 6º

Os veciños con formación e experiencia suficiente no exercicio profesional ou vocación relacionada con algunha das entidades deste servizo público, e que por determinadas circunstancias non poidan ser voluntarios operativos, poderán estar xunguidos á Agrupación mediante a figura de colaborador en misións de orientación, asesoramento, asistencia técnica ou axuda económica. A figura de colaborador pódese facer extensiva a aquelas entidades locais que desexen colaborar coa Agrupación en calquera dos apartados mencionados anteriormente.

Artigo 7º

A vinculación dos voluntarios co Concello non ten o carácter de relación laboral, administrativa, funcionarial ou mercantil, senón tan só de colaboración voluntaria para a prestación de servizos de xeito altruista como medio de realización de accións humanitarias de solidariedade social e boa veciñanza.

Artigo 8º

A incorporación á AVPC farase sempre en virtude da solicitude por parte do interesado, na que declarará non estar inhabilitado para funcións públicas por medio de sentenza firme e o compromiso de coñecer e acepta-lo contido deste Regulamento, así como o disposto na normativa vixente sobre Protección civil.



**Concello de
Oleiros**

Artigo 9º

A condición de membro da AVPC faculta únicamente para realiza-las actividades correspondentes á mesma, especialmente, en situacións de grave risco, catástrofe ou calamidade pública e nos operativos organizados e coordinados pola Agrupación. Os voluntarios non poderán realizar actividades de carácter persoal amparándose na pertenza a ésta Agrupación.

Artigo 10º

As funcións do voluntariado son, entre outras, as de: promoción da prevención e autoprotección cidadán, así como a colaboración, auxilio e apoio dos servizos públicos de protección civil, e , en todo caso, serán as indicadas no Plan de Emerxencia Municipal (PEMU) e demais plans de protección civil do sistema autonómico, aprobados pola Comunidade Autónoma de Galicia.

Artigo 11º

A Agrupación estruturarase, orgánica e funcionalmente, en seccións de acordo ás necesidades existentes no Concello ou na bisbarra, e en calquer caso, disporá das seccións correspondentes en consonancia coa tipoloxía de riscos definidos no PEMU e, se é o caso, no PLATERGA

Artigo 12º

Tóda-las actuacións que realice a AVPC en materia de protección civil no ámbito local, serán sempre autorizadas e coordinadas, ou se é o caso dirixidas, pola autoridade local correspondente.

Artigo 13º

O Presidente, o Secretario e o Tesorero da AVPC, e aqueles outros cargos que estatutariamente se prevexan, serán elixidos democráticamente entre os membros que teñan a condición de voluntarios de pleno dereito, de acordo ó establecido na lexislación vixente, sendo a duración do mandato de catro anos, podendo ser reelegido para novos mandatos.

Artigo 14º

Tódo-los compoñentes da AVPC ostentarán, sobre o lado esquerdo do peito, o distintivo de Protección Civil da Comunidade Autónoma de Galicia e no lado dereito, a tarxeta de identidade de voluntario, de acordo co disposto na normativa vixente ó respecto.



**Concello de
Oleiros**

Artigo 15º

A AVPC contratará un seguro de accidentes, así como de responsabilidade civil por danos a terceiros, que ampare os seus membros fronte ós riscos a que están sometidos no exercicio das suas funcións

Artigo 16º

Polo Servicio Municipal de Protección Civil elaboraránse e formularánse propostas para aprobación das normas de carácter especial ou xeral que sexan necesarias para o desenvolvemento e aplicación deste Regulamento, así como para a regulación da actividade da AVPC.

CAPITULO III **FORMACIÓN E PERFECCIONAMENTO**

Artigo 17º

A formación dos membros voluntarios, baseada nos coñecementos e habilidades relacionadas coas características propias deste servicio público, ten como finalidade facilitar a incorporación destas persoas en condicións de garantía e eficacia así como contribuir á selección dos aspirantes.

Artigo 18º

A actividade formativa e de perfeccionamento do persoal voluntario conforme ó disposto no Decreto 56/2000, de 3 de marzo, artellaráse da seguinte forma:

- 1) O nivel básico corresponde ós coñecementos mínimos que debe posuir un voluntario de protección civil para o correcto desenvolvemento das suas actividades.*
- 2) O segundo nivel ou nivel operativo corresponde ós coñecementos que deben posuí-los compoñentes das distintas seccións ou grupos operativos das AVPC*
- 3) O terceiro nivel ou nivel da especialidade ten como obxectivo a obtención da titulación oficial en determinadas actividades. Os cursos axustaránse ós oficiais dos organismos que os impartan.*
- 4) Ademais da formación regulada, a AVPC poderá propoñer outros cursos, xornadas e cantas actividades de formación considere oportunas.*
- 5) A actividade formativa completaráse coas seguintes accións:*



**Concello de
Oleiros**

- a) Exercicios prácticos de carácter periódico para a mellora permanente da preparación dos membros da Agrupación.*
- b) A organización de bibliotecas e fondos de comunicación sobre Protección Civil, e, especialmente, en relación co funcionamento e organización de agrupacións de colaboradores voluntarios e outras modalidades da participación cidadán nas actividades de protección civil.*
- c) O mantemento de relacións de colaboración mutua con outras Administracións Públicas ou Entidades privadas relacionadas ca Protección Civil.*
- d) A edición, colaboración, promoción de publicacións e a divulgación de recomendacións á poboación sobre temas de protección civil.*

CAPITULO IV **DEREITOS E DEBERES**

Artigo 19º

Son dereitos dos voluntarios de Protección civil no exercicio do seu labor de colaboración:

- a) Recibi-la información, formación, orientación, apoio e, se é o caso, medios materiais necesarios para o exercicio das funcións que se lle asignen.*
- b) Dispoñer dunha acreditación identificativa da súa condición de voluntario de Protección civil.*
- c) Emprega-la vestimenta homologada polo organismo competente en materia de Protección Civil da Xunta de Galicia.*
- d) Realiza-la súa actividade nas debidas condicións de seguridade en función da natureza e características daquela.*
- e) Participar na elección do Presidente, Secretario e Tesoureiro e demais cargos que estatutariamente se prevexan para a dirección da AVPC*
- f) Ser tratados sen discriminación, respetando a súa liberdade, dignidade, intimidade e crenzas.*
- g) Non ser asignados á execución de tarefas alleas ós fins da natureza da entidade.*

Artigo 20º

Son deberes dos voluntarios no exercicio do seu labor de colaboración:

- a) Gardar, cando proceda, confidencialidade da información recibida e coñecida durante o desenvolvemento da súa actividade como voluntario de protección civil, mantendo segredo análogo ó profesional.*
- b) Rexeitar calquer tipo de contraprestación económica que puidese recibir dos cidadáns afectados directa ou indirectamente polas actividades desenvolvidas.*



**Concello de
Oleiros**

- c) Actuar dilixente e solidaria, cumprindo coas indicacións e normas dictadas polos seus mandos naturais e as autoridades de protección civil.*
- d) Participar nas tarefas formativas previstas pola autoridade competente de protección civil ou pola AVPC, así como nas que con carácter permanente se precisen para mante-la calidade das prestacións.*
- e) Empregar axeitadamente a vestimenta de protección civil cos seus distintivos, así como levar ben visible a súa acreditación*
- f) Coidar e utilizar, de xeito adecuado os recursos e medios materiais que poña a súa disposición a AVPC, ou de se-lo caso, as autoridades de Protección Civil.*
- g) No suposto de causar baixa na AVPC por calquera circunstancia, entregará a tarxeta de identidade e o uniforme ó responsable da AVPC, así como o material asignado a súa custodia.*
- h) Cumpli-los compromisos acordados coa AVPC, respectando o disposto nos seus Estatutos.*

Artigo 21º

As AVPC deberán:

- a) Respostar a principios democráticos e participativos na composición dos seus órganos e no seu funcionamento.*
- b) Proporcionar ás persoas voluntarias a formación específica e a orientación necesaria para o exercicio das suas actividades.*
- c) Garantir ós voluntarios as debidas condicións de seguridade e saúde no desenvolvemento da súa actividade, así como o establecemento das correspondentes medidas de prevención de riscos.*
- d) Certifica-la actividade de persoas voluntarias con constancia dos seus datos persoais identificativos e a natureza e duración da actividade desenvolvida.*
- e) Informar ás persoas voluntarias sobre os fins e réxime de funcionamento da AVPC*
- f) Facilita-la participación do voluntariado na elaboración, deseño e execución e avaliación dos programas nos que interveñan.*

CAPITULO V **RECOMPENSAS E SANCIÓNS**

Artigo 22º

As condutas dos compoñentes da AVPC serán obxecto de valoración polos procedementos que se establezan nas correspondentes instrucións de desenvolvemento deste Regulamento. Distinguiranse como proceda as condutas meritorias e sancionaránse, de conformidade co establecido neste Regulamento, as infraccións ó previsto no mesmo.



**Concello de
Oleiros**

As recompensas e sancións anotaránse no expediente persoal do interesado:

Artigo 23º

As accións meritorias que impliquen un nivel de dedicación superior ás actividades ordinarias do servizo (ou riscos para a vida e a integridade dos voluntarios), poderán ser recompensadas co recoñecemento público mediante o correspondente escrito da Alcaldía ou a formulación pola mesma de proposta para a concesión de medalla ó mérito, placa, diploma de Protección Civil da Comunidade Autónoma ou calquer outra distinción que poidan concede-las distintas Administracións públicas ou o Concello, no seu caso, para premiar actos desta natureza especial.

Artigo 24º

As infraccións ó disposto neste Regulamento sancionaránse previa tramitación do correspondente expediente, unha vez escoitado o interesado que poderá en todo momento face-las alegacións oportunas.

As faltas considéranse leves, graves e moi graves

- I) Estimaránse como faltas leves e serán sancionadas con apercibimiento ou suspensión de ata un mes, atendendo ás circunstancias que concorran, as seguintes:*
 - a) O descuido na conservación e mantemento do equipo e material que tivera o seu cargo no cumprimento das misións encomendadas.*
 - b) A desobediencia ós mandos, cando isto supoña mal trato de palabra e obra e non afecte ó servizo que deba cumprirse.*
 - c) As demais infraccións ou omisións, con carácter leve, ó presente Regulamento.*
- II) Consideraránse faltas graves e serán sancionadas coa suspensión dende un a seis meses, atendendo ás circunstancias que concorran, as seguintes:*
 - a) Negarse ó cumprimento das misións que lle sexan encomendadas sen causa.*
 - b) A utilización, fora dos actos propios do servizo, do equipo, material e distintivos de protección civil.*
 - c) O deterioro ou perda, por negligencia, do equipo, material, bens ou documentos do servizo o seu cargo e custodia.*
 - d) As omisións ou infraccións graves ó preceptuado neste Regulamento e en particular o seu Artigo 9*
 - e) A acumulación de tres faltas leves no prazo dun ano*
- III) Serán causas de expulsión, como consecuencia de falta moi grave, as seguintes:*



**Concello de
Oleiros**

- a) Deixar de cumprir, sen causa xustificada, as esixencias do servizo.*
- b) Observar mala conduta ou ser sancionado reiteradamente por faltas graves.*
- c) Ser condeado por calquer acto delictivo a excepción das condenas derivadas de accidentes de circulación.*
- d) Utilizar ou exhibir indebidamente o uniforme e / ou as identificacións do servizo.*
- e) A agresión de palabra ou obra a calquera membro da Agrupación e a desobediencia que afecte á misión que deba cumprir.*
- f) Negarse a cumprir-las sancións de suspensión que lle foran impostas.*
- g) O incumprimento moi grave do establecido no presente Regulamento e en especial o disposto no seu Artigo 9º*

CAPITULO VI **RESCISIÓN DO VINCULO COA AGRUPACIÓN**

Artigo 25º

A relación de colaboración voluntaria coa AVPC terminaráse por:

- a) Petición do interesado*
- b) Falecemento*
- c) Declaración de incapacidade*
- d) Solicitude de baixa temporal ou definitiva*
- e) Perda dalgunha das condicións esixidas para poder ser voluntario.*
- f) Quedar incurso en situación de inhabilitación para o exercicio de cargos públicos por sentenza firme.*

Artigo 26º

Considerase baixa temporal na AVPC a suspensión da actividade na mesma como consecuencia de sanción ou a ausencia inferior a tres meses que teña motivos xustificadas que sexan comunicados oportunamente.

Artigo 27º

Serán causa de baixa definitiva na AVPC as seguintes:

- a) A petición do interesado*
- b) Incomparecencia do voluntario por tempo superior a tres meses, sen causa xustificada, á actividade ordinaria ou especial que lle corresponda.*
- c) Por incumprimento dos servizos mínimos esixidos.*



**Concello de
Oleiros**

d) Como consecuencia da comisión de falta considerada como moi grave de acordo co recollido no Artigo 24º, III deste Regulamento.

Artigo 28º

Acordada a baixa serálle notificada ó interesado, garantizándolle o dereito de audiencia, e unha vez feita efectiva, o voluntario procederá á inmediata entrega da documentación de identidade, distintivo, uniforme, equipo e material que lle fora adxudicado pola Agrupación.

Artigo 29º

En todo caso, expedirase a petición do interesado, un certificado no que consten os servicios prestados na AVPC e a causa pola que se acorde a baixa.

DISPOSICIÓN DEROGATORIA:

Queda derogado o Regulamento de Protección Civil aprobado polo Concello Pleno na súa sesión de 19 de febreiro de 1993.

DISPOSICIÓN FINAIS

1ª Pola Alcaldía, ou Concelleiro delegado de Protección civil, dictaranse as instrucións e directrices que sexan necesarias para o desenvolvemento e aplicación deste Regulamento.

2ª Este Regulamento entrará en vigor ó día seguinte da súa publicación no Boletín Oficial da Provincia.